

pur li. Si dice si vol partir per Damasco. Et è venuti oratori de India, a dir portogalesi li fa danno; il qual Signor ha dito stagino di bona voia, che si portogalesi li farà dano, anderà in persona a ruinarli. Scrive nostri hanno bona compagnaia de li, e le usanze *ut supra*; e altre particularita di merchadantia *ut in litteris*.

Fu posto, per li Consieri, scriver a l'Orator in corte per il piovan di san Zulian electo per li parochiani prè Nicolò era piovan a San Maurizio, et fu presa, 141-0-1.

Fu posto, per li Savii tuti, expedir Ali Bei dragoman orator dil Signor turco; darli ducati 500 contadi et ducati 500 in vestir d'oro lui e li soi e in altre robe, in tutto ducati 1000, aziò vadi ben satisfato. Fu presa.

Fu posto, per li ditti, una lettera a Costantino-poli al Baylo nostro, come è venuto questo magnifico Ali Bei, et richiesto tre cosse: prima, zercha il tributo di Cypro, qual zà l'havemo mandato siccome si à hautò aviso di Cypro; secondo, di carazari, che nui femo et havemo fato ogni provision per non li dar recapito etc.; 3° quanto al debito di sier Nicolò Zustignan che 'l richiede, che nui l'havemo pagato di quello el doveva aver da nui per spese fate come Baylo; ma per spese fece come merchadante, la Signoria non è obligata di pagarle, notificando a li bassà, che suo fratello sier Piero, hessendo nostro Camerlengo di comun, ha rubato a la Signoria assa' danaro, per il che l'havemo posto in esilio *ut in litteris*; sichè debbi zustificar li bassà di questo, over quel magnifico Bassà, non essendo zonto el Signor de li; con altre parole etc. Et che el dito magnifico Ali Bei torna ben carezato et apresentato da nui, et resta ben satisfato. Et fo presa: *tamen* era lettera da esser disputata. Io non son più in Pregadi, pacientia *Judicio meo*, importa assai dita lettera presa.

Fu posto, per li Savii tutti, expedir domino Filippo More orator dil re di Hongaria. Aziò vadi ben satisfato, donarli ducati 100. Et li Savii ai ordini messeno donarli ducati 200, et questa fu presa, *tamen* non parti, come dirò di soto.

Fu posto, per sier Zorzi Pixani dotor et reformador sora il Studio di Padoa, di condur a lezer a Padoa in *jure Canonico* domino Antonio Francesco di Dotori dotor padòan, qual fu assolto per il Consejo di X con la Zonta che 'l potesse tornar a Padoa al suo piacer, et nessuno lezesse a la matina, con fiorini 300.

37 Et sier Gasparo Malipiero andò in renga per

contradir, dicendo non è da mandar a Padoa a lezer per ogni bon rispetto. Et non fu lassato parlar, et il Colegio si tolse zozo, et fo domandà credenza di tal cossa.

Fu posto, per li Savii, certa parte, che li panni bergamaschi alti e bassi, quali si conduseano a le fiere da mar, da la banda di soto vento, li qual a li mexi passati fu preso dovessero prima esser conduti in questa terra a pagar certo dazio *ut in parte*, al presente la comunità di Bergamo si à dolesto, però sia preso che *solum* pagino grossi 4 a la Taola di l'intrata per peza, e i panni alti grossi pagi grossi 14 per peza, et li tre grossi per ducato, et non altro dazio ne angaria. I qual panni non si possi vender di qui aleun di coloradi; ma chi volesse meter panni di altre terre in questa terra lo possi far pagando i dazii, e non passando venderli soto pena di contrabando, et li patroni di barche siano ubligati a presentarli a la doana; con altre clausole *ut in parte*.

Et andò in renga sier Alvise di Prioli provedador sora l'Arsenal, et parlò zercha li pani, et non era di opinion per le raxon che 'l disse. Poi intrò nel bisogno di l'Arsenal, havendo il cargo ge è stà dato contro le leze, e che lui et el colega si volevano discargar. Et disse il numero di le galie era in la caixa et il bisogno dil resto, per esser mal fornito di ogni cossa. E benchè li do Patroni sieno fuori a far tajar legne, *tamen* senza danari non si pol far nulla, et bisogna ducati 70 milia a voler meter in ordine: ne hanno auto 10 milia, ma è pochi. Voriano 20 milia a un trato per far etc. E sopra questo parlò longamente. Li rispose sier Zorzi Corner el cavalier procurator, savio dil Consejo, era in setimana, giustificando il Colegio, e li voleno proveder, narando li danari li è stà dati, e che tuto è ubligato ad imprestado. Et parlò, *etiam*, per la parte di panni un poco. Poi disse se li faria dar ducati 300 di l'imprestado a la setimana, si cussi parerà a l'ecellentissimo Consejo di X con la Zonta, e si fa quel che si può. Andò poi suso sier Stefano Contarini, l'altro provedador sora l'Arsenal, et volendo risponderli zercha l'Arsenal, la Signoria col Colegio e li Cai di X li fe' dir parlasse su la parte; sichè non fu lassato parlar, et vene zoso perchè lui laudava. Andò la parte, et fu presa, 146-17-6. Et Pregadi vene zoso a hore 3 di note pasade.

Fu prima posto, per i Consieri, una confirmation di uno acordo fato a Roma per l'Orator nostro con Antonio Zenarin, per l'interdito di Chioza fato a di 29 Octubrio, *ut in parte*. Fu presa 149-6-1.